

Dr. José María Figueres di Carbon War Room

A haci entrega di un rapport titula ‘Smart Growth Pathways’

ORANJESTAD — Ayera mainta a tuma luga e entrega di e rapport traha pa Carbon War Room, titula, ‘Smart Growth Pathways’. Esaki a wordo entrega pa su presidente, Dr. José María Figueres na prome minister, Mike Eman.

COMPROMISO

Pa loke ta e contenido, Figueres ta remarca cu esaki ta un proceso cu ta den continuacion. E ta bisa cu nan a wordo introduci na e vision di Eman na final di 2011. Y asina a cuminsa traha cu e vision pa Aruba den e prome kwartaal di 2012 y a formalisa nan sociedad y compromiso cu Aruba. Un compromiso cu nan ta yama, “a 10 island commitment”, pa comparti loke nan siña traves di e experiencia aki cu Aruba, cu otro islanan den Caribe.

Figueres a bisa cu e ta bon pa tur hende na Aruba por lesa e rapport aki y por forma parti di dje y hasta contribui na su mehoracion. “Esaki tambe ta

un proceso unda nos ta spera pa traha cu ‘partnernan’ importante na Aruba y pafo di Aruba, manera entre otro, WEB NV y ELMAR cu ta dos organisacionnan fantastico cu a traves di e añanan a duna Aruba energia confiabel pa construi e bienestar den boso sociedad, pero tambe organizacion manera TNO y ‘partnernan cu Carbon War Room a trece pa participa den e meta aki”.

TERITORIONAN NOBO

Figueres ta sigui remarca cu e vision pa un Aruba 100% sostenibel, ta un teritorio nobo cu niun pais nunca ainda a bay den e direccion ey cu e tipo di dedicacion y conviccion cu Aruba ta haciendo cu ta haci cu Aruba ta un pais delantero pa loke ta trata transforma su mes 100% den un economia berde.

LOW HANGING FRUITS

E rapport ta concentra den loke nos ta yama ‘low hanging fruit’ cu ta algun seccion



di e economia di Aruba unda por logra reduccion rapido di emisionnan di carbon. Tambe e rapport ta mustra riba algun otro area unda e emisionnan di carbon ta menos. “Pa loke ta trata e parti di ‘low hanging fruit’ nos ta mira un gran cantidad cu por wordo haci den transforma e base di energia di Aruba den uno renoba. Nos ta papia di energia, transportacion, nos tin 50 mil vehiculo riba e isla cu den futuro tur por ta electrico. Y tambe

nos ta concentra riba efectividad den edificionan. 50% di e edificionan na Aruba ta drey riba airco y tin un cantidad tremendo cu por wordo haci riba esaki pa ta mas eficiente”, Figueres a bisa.

E rapport ta cubri diferente etapa for di cual nos kier move aden cu un bon velocidad pero na mes momento, tumando pasonan precisa sin cu tin riesgo, Figueres a sigui bisa.

ETAPA

E prome etapa ta esun cu ya a wordo tuma caba cu ta inclui e pasonan tuma cu proyecto di Vader Piet y panelnan solar cu ta un logro di mas o menos 12% di energia renoba den e consumo total. E di dos etapa, lo subi esaki na mas o menos 29%, cu lo rekeri e di dos proyecto di molina di biento, na Urirama. “Despues di esey nos kier traha cerca cu WEB y ELMAR cu por hiba nos den e rango di 80% y como di 4 etapa pa hiba esaki na 100% manera boso prome minister ta desea lo rekeri pa nos wak otro tecnologia, cu ya nos a cuminsa haci. Kiermen e ta un rapport extenso y completo”, Figueres a termina bisando. □

